

小
名
錄





叢書集成
初編

商務印書館



小 名 錄

陸 龜 蒙 撰

叢書集成初編

(補印本)

小 名 錄

一九三七年六月初版
一九五九年十月補印

陸 龜 蒙 撰

商務印書館出版

上海大眾文化印刷廠印刷

本館據稗海本排
印初編各叢書僅
有此本

小名錄卷上

唐 平原陸龜蒙撰

秦始皇二十六年兼并天下定郡三十六海內一統議立號除諡法自稱始皇以一世二世至于千萬世三十二年因奏鬼神圖書事曰亡秦者胡乃使蒙恬興兵三十萬北築長城以備胡三十七年始皇出遊丞相李斯與少子胡亥從西至平原津始皇病七月崩於沙丘丞相李斯立胡亥矯賜太子扶蘇死是爲二世趙高殺之於望夷宮而立子嬰遂亡亡秦者胡於斯驗矣

漢呂后名娥姁

武帝卽位尊太后母戍兒爲平原君

成帝名驚元帝之子以宣帝之世生於甲觀畫堂號曰世嫡皇孫皇帝愛之因曰太孫常置左右

司馬相如字長卿母少字之曰犬子長好讀書學擊劍慕蔭相如乃更名魏志管輅別傳曰輅父爲瑯琊郡太守

子春欲見輅父遣造之子春曰此年少戲有才器聽其言論似司馬犬子遊獵之詞

揚雄之子小字童烏九歲與子雲論玄

匡衡字稚圭少勤學家貧邑有大姓文不識家富墳籍衡乃爲客作而不求直主人怪問衡曰願得主人

書徧觀之主人感嘆遂給書衡能說詩時人語曰無說詩匡鼎來匡說詩解人頽鼎衡小字也其畏服

如此顏師古曰鼎正也如春秋鼎盛之美

齊太倉令淳于公有罪當刑。以無子爲嘆。少女緹縈。感激上書。願沒入官婢。以贖父刑。天子憐其意。爲除肉刑。改定律令。

成帝元始中。有渭城小女陳持弓。年九歲。走入城門。入未央宮內。尙方掖庭殿門。門者莫見。至鉤盾禁中。乃覺。

初武帝爲太子時。長公主欲以女配帝。帝尙小。長公主指女問帝曰。得阿嬌好不。帝曰。若得阿嬌作婦。當以金屋貯之。公主大喜。乃以配帝。是曰陳后。阿嬌。小字也。

東漢世祖諱秀。字文叔。初南頓君爲濟陽令。而世祖生。是歲嘉禾生縣界。大熟。因名秀。按此卽小名也。當時尙質。長途不更耳。故讖言劉秀作天子。二十一祖亦自負焉。

皇后郭氏。真定人。父昌。真定恭王。以女妻昌。昌早終。其妻號曰郭主。好禮節。儉。以王女之富。手常報作女。曰。聖通有寵。生皇子強。況以爲城門校尉。封綿曼侯。況。皇后弟也。賞賜甚厚。京師號爲金穴。

赤眉立劉盆子爲天子。初有說赤眉建立宗室。以竹誅伐。乃求得景王後七十餘人。唯盆子最親。盆子年十五歲。被髮徒跣。見衆人拜已。恐怖欲啼。盆子故武侯前子。王莽爲家人。赤眉過略。適盆子在赤眉中。爲劉俠卿牧牛。盆子旣立。猶朝夕拜俠卿。俠卿爲之跪。後祠景王於北郊。使盆子乘鮮車大馬。軍中牧兒皆隨車觀。曰。盆子在中。祠後復歸俠卿所。時欲出從牧兒戲。俠卿怒止之。樊崇等亦不復候視也。班昭。字惠姬。曹世叔妻。彪之女也。大家集云。父爲陳留長。大家隨至。作東征賦。初大將軍梁商獻美人於

順帝姓友字通期帝以歸商商不敢留而出嫁之冀卽遣客追盜通期還會商薨冀行服於城西廡常

與之居冀妻孫壽

梁紀之甥也

伺冀出卽多從蒼頭追通期歸治掠之因言當上書告之冀大恐頓首請於

壽母壽不得已而遂幽閉通期後冀復私召往來生子伯玉匿不敢出壽知之使其子河南尹胤械友

氏家冀恐壽害伯玉常置複壁中至年十五冀被誅乃出壽甚美而善爲妖惑好爲墜馬髻愁眉啼粧

折腰步齟齬笑性鉗忌能制冀冀不敢違冀愛監奴秦宮官至太倉令得出入壽每往來屏侍者私語

遂與宮通威振百寮刺史二千石冀於洛陽城門內起甲第而壽於狹街起宅與冀相高作陰陽殿連

閣通房魚池釣臺梁柱門戶皆銅沓紵漆青瑣丹墀刻鏤爲雲氣又采土築山十里九坎以像二嶠窮

極妙麗金玉明珠充牣其中冀與壽夜乘輦張羽蓋餽以金銀遊戲第中賓客詣門不得通謁謝門者

門者累千金冬十月冀與壽及諸子相隨游獵諸苑中縱酒作倡樂冀胡狗封襄邑侯壽爲襄城君

梁冀之誅太尉李固也郡縣承旨殺固二子憲公李公初並爲長史聞固策免皆棄官歸固知禍將及乃

命二公將小子變還鄉固女文姬涕泗曰李氏滅矣密與二公謀共逃宣言還京師矣鄉人信之後二

公果受害王成者固之僕餘也文姬厚爲其資以變屬成曰君執義於公家爲日久矣是以當危託君

六尺之孤若李氏復存君之名義齊於程杵成迺義士乃將變走徐州變姓名爲酒家僕賣卜於市會

赦得免成亦病卒變厚葬之變旣歸文姬涕泣曰先公嘗爲漢忠臣然梁氏暴虎今爾幸全血祀豈非

天乎宜杜絕衆人不然禍重至矣變敬從卒以獲免變學行才藝亞固官至京兆尹

傅變字南容性剛直不爲權貴改節出爲漢陽太守時冀郡羗反進圍郡城胡騎數千在城外叩頭欲令變棄官歸鄉里變子幹年十三亦曰願大人歸鄉里變慨然而歎呼幹小字曰別誠汝知吾心耶聖達節次守節伯夷不食周粟仲尼以爲賢生亂世何處求生汝其勉之魏太祖見幹年八歲時甚奇之及爲司空召幹爲尙書郎

彭寵之叛家數有變怪堂上聞蝦蟇聲在火爐下鑿地而求之不得卜筮多言兵從中起寵奴子密等三人謀劫寵是日寵齋便室晝臥三奴共縛寵從呼諸奴婢以寵教書問便收縛各置空室中以寵聲呼其妻妻入室見縛驚曰奴反耶猝妻頭擊頰趣爲諸將軍辨裝兩奴將妻入取物一人守寵寵謂守奴曰若小兒我素所愛也爲密所迫脅耳解我縛出閣則活矣用女妻汝家中財物悉與汝小奴意欲解之而子密適至遂不解使妻縫纊囊解寵手令作教告城門令子密等出勿稽留書成斷寵及妻頭置囊中馳詣闕封子密爲無義侯

魏武帝曹操字孟德一小名阿瞞故有曹瞞傳南陽許攸字子遠少與袁紹及太祖善官渡之役攸諫紹勿與太祖爭紹不從乃往詣太祖紹破走及後得冀州攸有功焉攸恃勳勞時與太祖相戲每在座席不自限至呼太祖小字曰阿瞞卿不得我不得冀州太祖笑曰汝言是也然內嫌之其後行出鄴東門攸顧左右曰此家不得我則不得出入此門人有白太祖太祖遂誅之

驍騎將軍秦朗字元明新興人父宜祿爲呂布使詣袁術袁術妻以漢宗室女其妻杜氏下邳人布之圍

關羽屬請於太祖，求杜氏爲妻。太祖疑其色，及城陷，太祖親見，乃納之。朗隨母蓄于公宮，太祖甚愛之。每座席謂賓客曰：豈有人愛假子如孤者乎？歷文世無尤。明帝卽位，爲驍騎將軍，帝以爲親愛，每顧問之。多呼其小字曰阿鱗。一本阿魚數蒙賞賜。

文德郭皇后少清慧，父永奇之，曰：吾此女，女中王，遂以女王爲字。早失二親，遭難流離，在銅鞮侯家。太祖爲魏公時，得入東宮，文帝所愛。

美人姓薛，名靈芸。靈芸年十七，容貌絕世。時文帝選良家子以入六宮，靈芸別父母升車，以玉唾壺承淚，壺皆紅色。帝遣文車十乘以迎靈芸，芸去京十里，帝乘雕玉之輦，以望車徒之盛，嗟曰：昔言朝爲行雲，暮爲行雨，今非雲非雨，非朝非暮，因易名爲夜來。夜來妙於針工，非夜來裁制，帝不服也。宮中號爲神針。

關內侯鄭小同，玄之孫也。玄別傳曰：玄有子爲孔融，吏舉孝廉，融之被圍，往赴爲賊害，有遺腹子以丁卯月生，而玄以丁卯歲生，命之曰同，長遂名焉。

李通，字文達，江夏平春人也。小字萬億，勇冠三軍，爲太祖所知，卒諡剛侯。

臧霸，字宣高，泰山人也。聞黃巾起，霸從陶謙擊破之，拜騎都尉，遂收兵於青徐間，與孫觀、吳敦、尹禮並聚衆，霸以兵助呂布，布敗歸太祖。太祖善之，霸一名寇奴，孫觀名嬰子，吳敦名黯奴，尹禮名盧兒，觀官至青州刺史，從征孫權，爲矢貫足，力戰不顧。

曹爽之專政也。其黨何晏、鄧颺、丁謐、爽敬之。言無不從。於時謗書謂臺中三狗，二狗崖柴不可當，一狗憑黠作狙囊。三狗謂何鄧丁黠，爽小字。其意言三狗皆欲齧人者。

(以下原缺二行)

孫權末臨海羅陽縣，有神自稱王表。羅陽今之安國周旋民間，言語飲食，與人無異。然不見其形，有一婢名紡績。

權遣中書郎李崇、齋輔國將軍羅陽王印綬迎表。表隨崇俱出，所歷山川，遣紡績與神相聞。崇與表至，權立第舍於蒼龍門外，數使近臣齋酒往。表說水旱小事，往往奇中。

後主孫皓，字元宗，一名彭祖，字皓宗，或云彭祖，小字也。

蜀劉封者，本羅侯寇氏之子，長沙劉氏之甥也。先主至荊州，未有繼嗣，養爲子。年二十餘，有武藝，氣力過人。將兵與諸葛亮沔流西上，所在戰克。益州既定，以封爲副中郎，稍遷副將軍。後與孟達會兵上谷，封與達忿爭不和，封奪達鼓吹，達懼，乃發表辭先主，率所領降於魏。文帝以達爲建武將軍，平陽亭侯。與徐晃共襲封，達與封害曰：「足下與漢中王、道路之人耳，親非骨肉，而據權勢，義託君臣，而處上位，征則有偏任之威，處則有副軍之號，遠近所聞也。自立阿斗已來，阿斗後主禪小字有識之人，相謂寒心。今足下棄父母，爲人後，非禮也。知禍將至而留之，非智也。見正不迴，從而疑之，非義也。號爲丈夫，爲此三者，何所貴乎？以足下之才，棄身來繼嗣羅侯，不爲背本也。北面事君，不爲棄舊也。恐爲亂以死亡，不爲徒行也。封不從。先主責封侵陵，諸葛亮勸除之。於是賜封死。歎曰：「恨不用孟子度之言。先主亦爲流涕。」襄陽書舊傳曰

習竺字文暉爲劉備治中 魏志載明帝破諸葛露布云劉備背恩自竄巴蜀諸葛亮棄父母之國阿殘賊之黨神厚備毒惡積身滅亮外慕立孤之名而內貪非禮之實斗之兄弟守空城而已

晉愍太子名遙字熙祖惠帝長子娉王衍小女字惠風其將廢也有童謠曰南風烈烈吹白沙南望魯國鬱嵬峩千歲髑髏上齒牙南風賈后小字也白晉行沙門太子小字魯賈謚國言太子遭賈后與謚相危之酷也

齊獻王攸字猷少岐嶷及長清和平易親賢好施愛經籍能屬文善尺牘世推才望出武帝之右景帝無子命攸爲嗣及帝崩攸年十歲哀動左右武帝踐阼時朝廷草創攸總統軍事撫寧內外莫不景附焉初文帝甚寵攸每見輒撫床呼其小字曰此桃符座幾爲太子者數矣及帝寢疾慮攸不安爲武帝敕漢淮南王魏陳思王故事而泣執手以授帝後爲荀勗馮紆所怨譖之大康三年乃下詔以攸爲大司馬都督青州諸軍侍中如故攸知勗等構己憤然而薨每就人借書必手刺其謬然後反之文明太后將崩謂武

帝曰桃符性急汝宜私之矣

石崇字季倫勃海清河人苞之子生於青州故小字齊奴苞六男崇是小子苞臨終分諸子財獨不及崇其母爲之言苞曰此兒雖小大能自得拜黃門累遷荊州刺史劫商致富遷征虜將軍崇有別館在河陽之金谷園一名梓澤諸事賈謚與潘岳爲二十四友有水碓三十餘區蒼頭八百餘人崇有愛婢曰綠珠美而工藝孫秀欲之使人求焉崇館於白下方登清涼觀臨清水使者以告崇出婢妾數十人以

示皆蘊蘭麝被羅縠曰任以擇使者曰君侯服御麗則麗矣然受命取綠珠崇勃然曰綠珠不可得也使者再三崇不許遂以告秀秀誅之崇復有愛婢名翔風魏末於胡市買得年始十歲至二十遂有容色妙別玉聲觀寶色石氏之富瑰寶皆殊方異國所得莫辨其處翔風別之皆出人地崇艷麗者數千翔風以文詞擅愛綠珠弟子宋緯國色等吹簫後入秦明帝宮中

王濬字士治弘農人也小字阿童爲益州刺史時吳中有童謠曰河童復何童御刀浮渡江不畏岸上虎但畏水中龍羊祜聞之乃表濬監益州加龍驤將軍竟平吳謠言應矣

賈充字公閻娶李氏名婉淑生二女一曰褒裕二曰筌裕李氏父豐被誅李坐流徙充復娶陽城太守郭配女槐妬忌甚李氏會赦得還帝特詔充置左右夫人充謙不敢當其實畏槐也筌爲齊王妃每號泣請充省李氏竟不往充有兒名黎生再周充自外入乳母抱在中庭兒見充喜笑充就憐之槐遙見謂充有私乃殺乳母兒啼不飲他乳遂死槐亦終身無子郭氏一字玉璣

瑯琊恭王觀妃小字銅環生元帝先有讖云銅馬入海建業期後元帝果興於江左

王戎字濬冲瑯琊臨沂人祖雄父渾阮籍素與渾友年十五在郎舍籍每過渾俄頃輒去過視戎良久方出謂渾曰濬冲清儻非卿比與卿言不如共阿戎談鍾士季日王安豐曰阿戎阿戎解人語

阮咸字仲容性任誕不拘小節私姑家之貉婢姑陟居初云留後乃携去咸時居喪聞之借客驢追之連騎而返獲議於世廢棄者久之及孚之生也其姑取王延壽魯靈光殿賦語曰胡遙集於上楹乃字曰

遙集。仲容每嘆曰：我雖失三公，然得遙集。

王凝之妻謝氏道韞，安西將軍奕之女也。初適凝之，還甚不悅。叔父安曰：王郎逸少子，不惡。汝何恨耶？答

曰：一門叔父，則有阿大中郎。羣從兄弟，復有封胡過未。封胡過未，四小字。不意天壤之中，乃有王郎。

謝太傅安寒食內集，兒女論文義，俄而雪驟，公欣然曰：白雪紛紛何所似？兄子胡兒胡兒，小字。曰：撒鹽空中差

可擬。兄女道韞曰：未若柳絮因風起。公大笑樂。明字長度，安次兄。據

謝胡兒語，庾道季庾，小字也。亮之子。諸人日暮欲就卿談，可堅城壘。庾曰：若文度王坦之字。來，我以偏師待

之。康伯韓來濟河焚舟矣。胡兒作著作郎，當作王堪傳，不諳堪，乃謔太傅。太傅答曰：世曹堪字。亦被遇堪

烈之子。阮千里、姨兄弟。潘安仁中表，安仁所謂子親伊姑。我父惟舅，是許元婿。

謝公因諸子集聚，問毛詩何句最佳。過稱曰：昔我往矣，楊柳依依。今我來思，雨雪霏霏。公曰：訐謔定命，遠

猷辰告。此句偏有騷人深知。過，女小字。過年少時，好着紫羅香囊垂裏子。叔父患之，而不欲傷其意，乃謔與

棋賭，賭得乃燒之。

桓宣武作徐州時，謝奕於晉陵先桓。經度懷而無異常。及桓遷荊州時，而晤之間，意氣甚篤。奕弗之疑。唯

謝虎子據小字。奕之弟婦王據取太原王。經女，名經。悟其旨，每曰：桓荊州用意殊異，必與晉陵俱西矣。俄而引奕爲司馬。

奕在溫座席，岸幘嘯詠。宣武曰：我方外司馬。

謝虎子常存屋燒鼠。胡兒既無由知之，聞人道有此者，戲之，非復一過。太傅既了己之不知，因語胡兒曰：

桓玄在南州起齋。悉畫盤龍。號盤龍齋。毅小字盤龍。至是居焉。

桓石虔。小字鎮惡。豁之子。有材幹。趨捷絕倫。從父在荊州。於獵園中。有猛獸被箭而伏。諸督將素知其勇。

戲令拔箭。石虔亦跳。高於獸。獸伏。復拔一箭以歸。有患瘡者。呼石虔來。疾者多愈。虔年十八。九未破。舉

褚爽。字茂弘。河南人。太傅裒之孫。祕書監詔之子。太傅謝安見其少。嘆曰。若期生。爽小不佳。我不復論事。

及長。果俊邁。有風氣。好老子。當世榮譽。弗之屑也。唯與殷仲謀交善。遷中書郎。始興太守。

王忱。字元達。坦之子。王恭隨父蘊在會稽。王大忱小都來拜墓。恭暫往。墓下看之。二人素善。遂十餘日。方

還。父問何故多日。對曰。與阿大語。蟬連不得歸。因語之曰。恐非爾之友。中乖愛好。後爲玉緒所間。終成

怨隙。果如其言。

司馬太傅爲二王題目曰。孝伯亭亭直上。阿大羅羅清疎。王恭始與建武甚有情。後遇表悅之。間遂致疑

隙。然每有興會。故有相思。時恭常行散。至京口射堂。于時清露晨流。新桐初發。王因嘆曰。王大故自濯

濯。王恭從會稽還。王大看之。見其坐六尺簾。因語恭曰。東來故應有此物。可以一領與我。恭無言。及王

大去後。舉所坐簾送之。旣無餘席。便坐薦上。大後聞甚驚。曰。吾本謂卿多。故求取。對曰。大人不悉恭。恭

作人無長物。

王澄。字平子。高風不羣。曠達獨傲。每聞玠談名理。輒絕倒。人曰。衛玠談道。平子三倒。後王敦爲大將軍。鎮

豫章。玠避亂投敦。與之談彌日。信宿。敦曰。昔王輔嗣吐金聲於中朝。此子復玉振於江表。微言之緒。絕

而復續不悟永嘉之末復聞正始之音阿平澄小若在當復絕倒矣

王衍嘗爲天下人士題目曰阿平第一子嵩庚第二處仲宣第三敦王孝伯恭問王大曰阮籍何如司馬

相如王大曰阮籍曾中壘塊故須酒澆之王佛大笑曰三日不飲酒便覺形神不復相親

謝遏夏日常仰臥謝公清晨卒來不暇着衣跳出房外躡履問訊公曰汝可謂前踞後恭也謝太傅未冠

時始出西王長史濛與清談良久去後荀子王脩問曰向客何如尊長史曰向客聲塵風采逼人敬仁

濛之子

許掾少時人以比王荀子許大不平後因會稽西寺講王理遂屈僧意在瓦官寺中王荀子來與共語使

者唱禮便謂王曰聖人有情否王曰無重問聖人如柱耶王曰如籌算耳雖無情運之者有情意曰誰

運聖人也荀子不得答而去

庾統字長仁衛將軍懼之子也少有令名仕至潯陽太子簡文目庾赤玉省率除理謝仁祖常云庾赤玉

曾中無宿物統小字赤玉王坦之弱冠與郗超俱有重名時人爲之語曰盛德絕倫郗嘉賓江東獨步王文

度嘉賓超小字超字景興高平人司空培之子超少有才氣超世邁俗常檢語曰大才槃槃謝家安盛德日新郗嘉賓

桓公語曰嘉賓阿源殷浩字巨源有德有言向使便作令僕足以儀刑百揆朝廷用違其才耳嘉賓欽

崇釋道安德問餉米千斛修書累紙意寄殷勤道安答云損米彌覺有待之爲煩

郗嘉賓書與袁虎隴小字戴安道謝居士云恆任之風當有所引耳以無常以此激之

范啓與嘉賓書曰。子敬舉體無饒縱。掇皮無餘潤。郗答曰。舉體無餘潤。何如舉體非真也。范性矜假。多煩

嘲之。郗融。小字倉融。卽嘉賓弟也。郗司空拜北府。舊徐督以東爲晉氏南遷徐州刺史。王黃門字子

微詣郗問云。應變將略。非其所長。驟詠之不已。郗倉謂嘉賓曰。公今拜子猷。言殊不遜。深不可容。嘉賓

曰。此是陳壽作諸葛亮評。人以汝家比武侯。

王臨之。字仲產。僕射彪之子。位至東城太守。王右軍曰。我家阿林。臨之小字清章太出。

郗恢。字道胤。小字阿乞。王子猷詣郗雍州。郗在內見有髡髻。云。阿乞那得物。勅左右送還家。郗出覓之。曰

向有大力者。負之而趨。郗無忤色。

王胡之子循齡。清約以風操自居。才器率衆。舉有秀悟。小字阿齡。謝太傅語劉長卿曰。阿齡於此事欲大

屬。劉曰。亦名士之高操者也。

王蘊。恭之父也。小字阿興。世稱荀子秀出。阿興清和。

王珣。字元琳。小字法護。一云阿瓜。謝公領中書監。王東亭有事應同上省。王後至。坐促。王謝雖不通。太傅

猶斂膝容之。王神意甚閑暢。謝公傾目。還謂劉夫人。安娶沛國劉妣女。字安國。眞長之妹。曰。向見王瓜。故自未易有。雖不

相關。正自使人不能已。王珣。字季琰。珣之弟子。小字僧珍。有才藝。善行書。名出凡流。故有語曰。僧珍難

爲兄。法護難爲弟。累遷侍中。中書令。王大□□□□□□□□□□王僧珍來。卽出視之。僧珍得便。以

己意改所選者。近半。主人甚以爲佳。卽寫更奏。

僧珍、謝車騎玄、共集王、小奴許、小奴小奴、僧珍舉酒勸謝云、奉使君一觴、言曾為徐州、故云使君、謝曰、可爾、僧珍勃

然起作色曰、汝故吳興溪中釣碣耳、何敢侮張、玄叔父曾在吳興、玄少時從之遊、王珉故云、謝徐撫掌而笑曰、衛君珍殊不

蕭省、乃凌上國、

捉婆初至、僧伽提婆、劉濱國人、姓置曇氏、為王東亭第講阿毗曇、此法也、始發講才半、僧珍便云、都已曉、即於坐分數四

有、意道人便就餘屋自講、講竟、東亭詢問法門、道人曰、弟子都來未解、阿珍那得已講、所得云何、尤狙

也、尤狙、不可解

吳孫權步夫人臨淮陰、淮陰以美麗得幸、生二女、長曰魯班、字虎、前配周瑜子循、後配全琮、少曰魯育、字

小虎、前配朱據、後配劉纂、

孫休、字子烈、權第六子、即位立子贛為太子、乃下詔曰、人之有名、以相紀別、長為作字、憚其名矣、禮名子

欲令難犯、易避、合為四方作名字、太子名贛、音如湖水、灣瀨之灣、字蘭、音如迅、令之迅、次名庠、音如兜、輓之兜、字彞、音如儼、首之儼、次名

鉅、音如草、草之聲、字盈、音如舉、物之舉、次名音如哀、寬大之哀、字焚、音如擁、特有所之特、此都不與世所用同、故鈔舊文、今造此字、既

不相配、又字但、一庶易避也、普告天下、咸使聞知、此名之奇怪、故附于此

孫亮、字子明、權少子、權薨、即尊號、亮有愛姬四人、皆振古絕倫、一名朝姝、二名麗居、三名潔華、四名洛寶、

又作綠琉璃屏風、甚薄而徹、每月下清夜、舒之、使四姬坐屏風內、而外望之、如無隔、唯氣不通耳、為四

姬合四氣香、皆異國所出、香氣在衣、歷年瀰盛、百濯不歇、因名百濯香、聞曰大略全是、故未嘗有精嚴

耳

王恬字敬豫。小字阿螭。少好武。不爲文公所重。丞相每見。長豫字悅則喜。見敬豫則瞋。阿螭娶爲中興第一。

謝公嘗與謝萬共出西過吳。阿欲相與。萃王恬所。恬時爲吳郡太傅曰。恐汝不必酬。汝意不足爾。萬猶苦要。

太傅堅不迴。萬獨往。坐少時。王便入內。謝殊有忻色。以爲厚待。已良久。乃沐頭散髮而出。亦不坐。仍據。

胡狀在中庭晒頭。神氣傲邁。無相酬對意。萬於是乃還。未至船。乃逆太傅曰。阿螭不作鱗。

王彭之字安壽。小字虎狔。彪之字叔武。小字虎贖。皆彬之子。彪之年二十。鬢皓白。時人號爲生白髮。爲會。

稽內史。豪右斂手。是時桓溫廢海西公。百寮莫知所爲。彪之謂溫曰。取霍光傳來。禮度儀注。定於須臾。

歎曰。元彪不當如是也。

王右軍在南。丞相與書。每嘆子姪不令。云。虎狔虎贖。還其所知。

王司州胡嘗乘雪往王螭許。司州言氣。有小相忤逆於螭。螭便作色不怡。司州覺惡。便舉狀就之。持其臂。

曰。汝詎復與兄老計也。螭撥其手曰。冷如鬼手。強來捉人臂。

王文度弟阿智。王度之小字不翅。年長而無人與婚。孫興公有一女。小字阿桓。亦僻錯。又無嫁娶禮。綽因詣文。

度求見阿智。既見。便揚言此定可殊。不如所傳。那至今未婚。我有一女。但吾寒士。不宜與卿計。文度欣。

然而啓藍田。述□□驚喜成婚。女之頑囂。更過阿智。文度爲桓公長史。桓爲兒求玉女。王許諾。咨藍。

田。既還。藍田愛念文度。雖長大。猶抱膝上。文度因言之。述大怒。排文度下膝曰。兵那可嫁女與之。文度。

還報云。家中得婚處。桓曰。吾知矣。此尊府君不肯耳。後桓女遂嫁文度兒。王氏譜坦之子。愷。娶桓第二女。女字伯子。愷仕至丹陽尹。

庾翼字稚恭。爲荊州臨終。自表以子園客。庾玄之字。仲直小字。自代。朝廷慮其不從命。未知所爲。乃共議桓溫。劉恢

曰。使伊去。必能克定荊州。恐不可復至。後果如恢言。

桓伊字叔夏。譙國銍人。父景護將軍。伊少有才藝。善音律。爲劉恢王濛所知。有蔡邕柯亭笛。常自吹之。王

徽之赴召京師。泊舟於青溪側。伊素不與徽之相識。伊於岸上過。船中客稱伊小字曰桓王也。徽之使

人謂伊曰。聞君善吹笛。試爲我一奏。伊時貴顯。素聞徽之名。使下車踞胡床。作三調弄。上車便去。主客

不交一言。一云。字子野也。桓公問子野。謝安石知萬石必敗。何以不諫。子野曰。固當出於相難。桓作色

曰。萬石橈弱。凡才有何顏難犯。桓野每聞清歌。輒喚奈何。謝公聞之曰。子野可謂一往有深情。

桓嗣字祖恭。冲之子也。小字豹奴。人或謂之桓豹奴。是王丹陽王外甥。形似其舅。桓甚諱之。宣武云。不恆

似。時似耳。恆。偁是形。時似是神。桓愈不悅。

桓允素輕桓崖。桓崖小字。家在京下。有好桃。玄連就之。遂得佳者。玄與殷仲文書曰。德之休明。肅慎。貢其楛矢。

如其不爾。籬壁間物。亦不可得。

陶範字道。侃第十九子。諸子中最知名。王脩齡嘗在東。甚貧乏。陶胡奴範小字。爲烏程令。送一舟米遺之。

却不肯取。直答語。王脩齡若饑。自當就謝仁祖索。不須陶胡奴來。

袁宏始作東征賦。都不道陶公。胡奴誘之狹室中。臨以白刃。曰。先公勳業如是。君作東征賦。云何相忽略。宏窘蹙無計。便云。我曾大道。何以云無。因語曰。精金百鍊。在割能斷。功則治民。職思靖亂。長沙之勳。爲史所讚。

江敞字仲愷。濟陽人。父彪。僕射。敞歷黃門侍郎。御驃騎諮議。王恭請盧奴數小爲長史。晨往詣江。江猶在帳中。王坐不敢卽言。良久乃得及。江不應。直呼人取酒。自飲一碗。又不與王。王且笑且言。

後趙石季龍殺勒子弘僭位。大饗羣臣於太武殿。佛圖澄吟曰。殿乎殿乎。棘子成林。將壞人衣。季龍令發殿石。下視之。有棘生焉。諸石後爲冉閔滅。略盡。閔小字棘奴。

石季龍立子邃爲太子。邃字大淵。少而雄慧。帝深愛之。及爲嗣。每顧左右曰。馬家父子兄弟。自爲殘滅。若其不然。吾豈有今日。如我當有殺阿鐵理乎。鐵遂小字。及邃總百揆。荒耽酒色。驕恣無道。不堪儲嗣。乃廢爲庶人。邃及張妃男女共六人。其夜賜死。合一棺埋之。

前燕慕容冲初符堅之滅。慕容雋冲妹爲清河公主。年十四。有殊色。堅納之。冲年十二。有龍陽之姿。堅又幸之。長安歌曰。一雌復一雄。雙飛入紫宮。咸懼爲亂。王猛切諫。乃出冲。長安又謠曰。鳳凰鳳凰。止阿房。堅曰。鳳凰非梧桐不棲。非竹實不食。乃各植數千株於阿房。以待之。冲小字鳳凰。是終爲堅賊。入止阿房。後冲進攻長安。堅登城責之曰。爾輩羣奴。止可牧牛羊。何爲送死。冲曰。旣賦奴苦。取爾見代。冲竟僭位於阿房前。

秦符生之嗣僞位。酷暴。夜對侍婢曰。阿法。清河王小字兄弟亦不可信。明當除之。是夜清河王符法夢神人告

之曰。且將禍隼汝門。先覺者可以免之。寤而心悸。會婢來告。乃率壯士數百人。潛入雲龍門。符堅率麾

下鼓譟。生猶昏睡。堅衆既至。引置之別堂。廢之爲越王。俄而殺之。符堅字永固。一字文玉。小字肩頭。祖

洪父雄。伯父捷。西入關。夢天神使者。赤冠朱衣。拜肩頭爲龍驤將軍。捷因爲壇於曲沃以授之。捷泣謂

堅曰。汝祖昔受此號。汝爲神明所受。可不勉歟。符生既殘。雪無度。堅殺之。遂僭號秦王。

後涼呂纂。字永緒。光庶子。殺光長子紹。僭卽尊號。有若番太守呂超。擅伐鮮卑思盤。纂見超曰。胡奴卿恃

兄弟。恆欲欺吾耶。要當腰斬。然後天下定。超頓首謝曰。不敢。纂引超及諸州臣。燕於內殿。呂隆屢勸纂

酒。遂至昏醉。超取劍擊之。洞胸。奔于宣德堂。將軍魏益多人。斬纂首以狗。初纂與沙門羅什棋。殺。什曰。

斫胡奴頭。什曰。不斫胡奴頭。胡奴斫人頭。胡奴超小字。竟殺纂。驗矣。

涼天水太守史稷。暴疾而死。五旬乃蘇。云見涼光殿中。皆生白瓜。至秦使梁熙至。熙小字白菰。西涼武超

王李暠字玄盛。小字長生。後立歆字士業。玄盛夢爲涼公。領涼州牧。代沮渠爲蒙遜所殺。士業之未敗

也。燉煌父老令狐熾。家見白頭翁衣袷。職曰南風動。吹長木。胡桐推木中。穀言訖不見。士業小字桐推。

至是乃亡。

後燕慕容農。字厚。小字穎慧。垂第三子也。年九歲。問太史黃紉曰。俗稱參辰相見。萬人相食。各自一宿。何

爲如是。紉曰。昔高辛氏有二子。長曰伯閼。主辰。次曰實沉。主參。日尋于戈。自相征討。後帝不臧。使伯閼

主辰。管沉主參。別而離之。相見則爭。故代傳言然。農曰。天有定宿。以人甄之。而成憎愛。二子之前。參辰云何。緼不能對。垂深奇之。

小名錄卷下

宋高祖劉裕，字德興，小字寄奴。

少帝義符，小字車兵。武帝長子，立二年，昏悖。太后召羣臣廢帝，爲榮陽王。

文帝名義隆，小字車兒。武帝第三子，立三十年，爲太子，邵元寬所殺。

孝帝武駿，字休龍。小字道民。文帝第三子，討元寬，立十一年崩。

前廢帝子業，小字法師。孝武長子，殘忍無道。湘東王彧廢之，在位一年。

明帝彧，字休炳。小字榮期。文帝第十一子，立七年崩。

後廢帝昱，字德融。小字慧震。明帝長子，無道淫虐。蕭道成廢之。

順帝淮，字仲謀。小字智觀。立三年，禪位於齊，封汝陰王。

廣陵王義直，字車士。爲揚州刺史。太后謂帝曰：道隣汝布衣時，兄弟宜用爲揚州。上曰：寄奴於道隣，豈有

所惜。但揚州根本所寄，事務至多，非道隣所了。太后曰：道隣年出五十，不如汝十歲兒也。上曰：車士雖

爲刺史，事無大小，皆由寄奴。道隣年長，不親其事，則於聽不足。太后默然。

王愉，小字駒。晉尚書僕射。江右冠族。子綏，亦有重名，以高祖起自布衣，甚忽之。裕晚得志，悉誅之。唯司徒

王謐有舊恩，雖爲桓玄佐命，終保持之，不得誅。謐從弟湛，謂駒無罪，義旗誅之。此是剪除勝己，以絕民

望兄桓氏黨附而名位如此。欲求免得乎。諡懼。奔于曲附。高祖迎還復位。

劉穆之字道和。小字道民。高祖初尅京城。謂何無忌曰。急須得一府主簿如何。何無忌曰。無過劉道民也。劉秀之。小字何秀。瑀族叔。秀之爲丹陽尹。瑀與親故書曰。吾家黑面何秀。遂居劉。衆處朝廷不爲多士。王鎮惡祖猛。父休。五月五日生。家以俗忌。欲以出繼。疎宗猛見曰。此非常兒。昔孟嘗君以五月五日生。而將興吾門矣。遂用爲嗣。鎮惡後封博陵侯。進號征虜將軍。

向靖。小名稱。與高祖諱同。改稱小字。今傳稱向彌是也。

蔡廓常器其小子。與親故書。小兒四歲。神器似可不入非類。不與小人遊。故以興宗爲之名。興爲之字。褚渾之。小字佛佛。高祖以舊功愛之。會稽郡偶缺。朝議欲蔡廓爲之。高祖曰。彼自是蔡家佳兒。于我何事。不如與褚佛佛。

傅亮秉政。將拜蔡廓爲吏部尙書。因傅隆問廓曰。若以選事悉付我。我則爲之。不然。卽不拜。亮語徐羨之曰。黃門郎以下。當盡委於蔡。羨不復措手矣。以上則共參同異。廓曰。我不能與徐干木。小字。署紙尾。遂不拜。吏部黃紙案。吏部尙書與錄尙書連名。故廓云署紙尾。

劉敬宣爲青州都督。諸葛長民招以同叛。敬宣遂遣使呈。高祖曰。阿壽。小字。敬宣。正謂不負我也。

謝述與劉湛爲異常之交。湛美甚。有風度。謂人曰。我見謝道兒未嘗足。小字。道兒。述。

謝靈運。小字客兒。初錢塘杜明師。夜夢中向有人來入館。是夕卽靈運生於會稽。旬日而謝玄亡。其家以

子難得遂送靈運于杜治養之十五方還郡故名曰客兒

明師名吳昊不恭性敏悟宗事正一少參天師治錄陸納爲尙書年三十患創昊爲奏章

延至七十

袁粲字景倩父灌早卒祖母哀其幼孤名之曰敏孫有風操著妙德先生傳以續嵇康高士傳敏孫少慕荀奉倩爲人乃白太祖字景倩

始興王濬字休明將產之夕有鵬鳥鳴於屋上巫蠱事發上謂潘淑曰妃太子圖貴富更是一理虎頭

潘

也復如此非思慮所及汝母子豈可一日無我也皆賜死

謝弘微父母思武昌太守從叔峻無子峻以弘微爲嗣本名密犯所係內諱故以字稱與族子靈運瞻隲

並以文義賞會居烏衣巷同遊叔父混敬賞之嘗曰阿遠

瞻小

剛而負氣阿客博而無檢矧奴才而昧

操篤善不同設後功濟三子終亦以此爲恨微子吾無間然

王微字景玄瑯琊人也善屬文能書畫爲吏部郎弟僧謙亦有才幹爲太子舍人遇疾微躬自處治而謙服藥夫度遂卒微深自咎恨發疾不治哀痛不已以書告靈曰吾素好醫術不能使爾得全又尋思不精至使枉遇痛酷奈吾罪何阿謙何圖至此誰復視我誰復憂我他日寶吝三光割嗜好以祈年今也唯速化耳後謙四十日卒

謝靈運解職東歸惠連幼有才悟而輕薄不爲父方明所知靈運去永嘉還始寧時方明爲會稽郡靈運見惠連大相知賞何長瑜教惠連讀書亦在郡靈運又以爲絕倫謂方明曰阿連少悟如此而尊以常

兒遇之。何長瑜當今仲宣。飴以下客之食。尊既不能禮賢。宜以長瑜還靈運。遂載之而去。

劉湛字弘仁。小字班虎。太祖自豫州長史。徵爲太子詹事。時彭城王義康權傾中外。湛與推崇之。無復人臣禮。上稍不平。湛初入。朝夕引接。不夕不出。晚節上意稍離。而接遇不改。上嘗謂所親曰。劉班初自西還。吾嘗看日早晚。慮其當去。比入朝。亦看日早晚。慮其不去。遷丹陽尹。竟伏誅。殷景仁與湛俱爲太守。任遇初相款洽。後漸猜隙。義康專權。而湛昔爲上佐。以舊情自結。傾黜景仁。義康盡屬湛諸人。附款無復至殷氏門。湛黨劉敬文父成。未悟其機。詣景仁求郡。敬文遽往謝湛曰。老父悖老。遂就殷鐵求郡。有負生誠。闔門慚懼。其姦諂如此。阿鐵景仁小字。

卮曄字蔚宗。父泰。母如廁產之。額爲博所傷。故小字博。而徐湛之小字仙僮。初魯國孔熙有異才。爲散騎常侍。以父黜之。受義康恩。欲伸報德。又以范曄不得志。因曄外甥謝綜結曄。曄之爲丹陽尹。悉約太子送南平王鑠出鎮於武張崗。祖道日作亂。而差牙不得發。曄之乃上表發之。且以自明。及收入獄。曄隔壁遙問綜曰。始被收時。疑誰所告。綜曰。不知。曄曰。徐仙僮也。悉伏誅。

曾爽小字女生。祖宗之南陽郡公。宗之子軌。一名象齒。卽爽之父也。爽少有武藝。弟秀字天念。才力過爽。建中義宣謀反。戰飲酒過度。敗斬之。

劉南陽。汨陽人。本字拗胡。以其顏面拗黑似胡。及長。乃單爲胡。出牙郡。將捷口善處分。稍至隊主。蠻甚畏之。小兒啼怖之曰。劉胡來。便止。

陶潛字元亮。一字淵明。集載責子詩云。白髮披兩鬢。肌膚不復實。雖有五男兒。初不好紙筆。阿舒已十二。懶墮故無匹。阿宣行志學。而不好文術。雍端年十三。不識九與七。通子垂六齡。但覓棗與栗。天運苟如此。且進盃中物。又載與儼等疏云。告儼俟份修等云云。又有命子詩云。三千之罪。後最及成。念呱呱開爾泣。卜嘉曰。占亦良時。名爾曰儼。字曰求思。按此儼。卽阿舒也。

鮑照字明遠。妹字令暉。有才思。亞於明遠。著香茗賦。集行於世。

齊高帝名道成。字紹伯。小字鬪將。世祖皇帝熙字宣遠。太祖長子。生於建康青溪宅。其夕陳孝后劉昭后同夢。龍據因小字曰龍兒。初高祖在府。夢着屐上太極殿。三人從。一人武帝。一人明帝。一人張天地圖。而不識。意言是梁太祖子弟。及踐阼。常與梁太祖密。晏謂曰。我辛苦得天下。而祚不傳孫。我死龍子當得。龍兒也。龍子死當屬阿度。玄度也。此後當還卿子。

鬱林正昭業。字文尙。文惠太子長子。小字法身。文惠薨。立爲皇太孫。美容止。好隸書。世祖勅皇孫手書。不得妄出。意貴重之。賞呼爲法身。坐之重幄。別撫問。卽位不君。以罪廢。

高宗明皇帝鸞。字栖景。始安王道生子。小字玄度。自宣城王卽位。文惠太子長懋。字雲喬。世祖長子。小字白澤。

前湘州刺史王蘊。太后兄弟。有膽力。以父楷名官不達。將欲自奮。每撫劍曰。龍泉太阿。汝知我者。叔父景文曰。阿答滅我門戶。蘊答曰。與童烏貴賤覺異。童烏景文子絢。小字阿答。蘊小字。後與劉康玄。察謀反。

死。

王琨祖蒼音衛將軍。父懌不慧。初不爲娶。家以獠婢侍之。生琨。遂名崑崙。懌後娶南陽樂玄女。無子。改名琨。立以爲嗣。性清慎。官至侍中。

長沙威王晃。宣明太祖第四子。有武力。太祖愛之。臨崩。以晃屬世祖。晃愛武飾。鞠罪徐州。私載數百人犯還都。爲禁司所覺。棄之江水。世祖大怒。豫章王嶷御前稽首涕泣曰。晃罪誠不足宥。陛下當憶先朝念白象。上亦垂泣舍之。白象。晃小字。

武陵昭王曄。字宣照。太祖第五子。母羅氏。以罪誅。曄見愛世祖。卽位。曄數以言語忤旨。世祖嘗幸豫章王嶷東田。宴諸長王。獨不召曄。嶷曰。風景殊美。今日甚憶武陵。上乃令呼之。曄善射。屢發命中。顧四座曰。手如何。上神色甚怪。嶷曰。阿五常日不爾。今日可謂仰藉天威。帝意乃釋。阿五。曄小字。

鄱陽王鏘。字宣韶。太祖第七子。有寵於世祖。鏘雍容得物情。上爲鬱林。心疑高宗。諸王問訊。獨留鏘。問曰。鬱於法身鬱林小字何如。鏘曰。臣鬱於宗戚。長且受寄先帝。臣等年皆少。朝廷之幹。唯鬱一人。願陛下無以爲慮。鬱林退。謂徐龍駒曰。我欲與公共計取諱。公旣不同。我不能獨辦。且復少聽。鬱林爲高宗所廢。鏘竟不如。初高宗東府權勢稍異。鏘每常屢奉迎。鏘語及家國。言淚俱下。鏘以此推信之。鏘竟被害。

東昏侯潘淑妃。小字玉兒。帝爲潘起神仙永壽玉殿。鑿爲蓮花貼地上。令潘妃行曰。步步生蓮花。常市琥珀釵一隻。直百七十萬。

劉瓛字子珪。沛郡相人。晉丹陽尹恢六世孫。少篤學。博通五經。聚徒教授。常有數千。性至孝。祖母病疽。經年。手持膏藥。漬指皆爛。孔氏甚嚴明。謂所親曰。阿稱瓛字便是。今世曾參諡真蘭先生。

王思遠。晏之從弟。父羅云。平西長史。有節操。竟陵王子良。薦爲吏部尙書郎。初高宗廢立之際。晏預其謀。思遠謂晏曰。兄蒙世祖厚恩。今一旦贊人如此事。彼或以計相須。兄將來何以自立。若及此引決。猶可。後悔無及。晏不納。及高宗卽位。拜驃騎。爵爲王。遙光勸除之。晏集會子弟。謂思微曰。隆昌之末。阿戎勸

吾自裁。若從其語。豈有今日。思遠遽應曰。如阿戎所見。猶未晚耳。晏竟誅。思遠遷侍中。阿戎字

盧陵王子卿。小字烏熊。太祖第三子。出爲南豫州刺史。帝謂司徒竟陵王子良曰。烏熊癡如熊。不得天下

第一人行事。無以狀一州。旣而曰。吾思得其人矣。乃使陸惠曉爲長史行事。臨別。帝問惠曉曰。卿何以輔盧陵王。惠曉對曰。靜以脩身。儉以養性。靜則身不擾。儉則民不煩。雖庸者猶當知勉。況盧陵以帝子之尊耶。帝大悅。

袁象字偉才。陳郡夏陽人。父顓。武陵太守。少有風氣。好屬文。談玄。舉秀才。歷諸王府參軍。不就。顓臨終。與兄覬書曰。史公才識可喜。足懋先基。象有孝節。累遷侍中。史公象小字。象形體充腴。有異於衆。每從車騎射雉郊野。數人推扶。乃能履。

張冲字思約。吳人。冲出繼伯父景徹。景徹字檀。父邵小字黎。宋文帝戲景徹曰。檀何如黎。徹答曰。黎是百果之宗。檀何敢及。

張敬兒。南陽冠軍人也。父醜爲郡將。母常在田耨拾困極。乃臥於澆間。夢有物如犬子。頭有角牴之。因感而有娠。故小字狗兒。宋明帝以其名鄙。改焉。年少便馬。有膽氣。好射虎。發無不中。累以軍功爲南陽守。斬桂陽王休範。遷雍州刺史。驍騎將軍。封襄陽侯。狗兒後更名恭。而不肯出官。嘗居南保村中。與居民不異。敬兒竟爲世祖所誅。

巴東王子嚮。爲荊州刺史。直閣將軍。董蠻奴粗有氣力。子嚮要與同行。蠻奴曰。殿下顧如雷。敢相隨乎。子嚮笑曰。君敢出此言。亦復奇。顧上聞而不悅。曰。人名蠻奴。復何容得蘊藉。乃改名仲舒。

梁武帝衍字叔達。小字練兒。

簡文帝諱綱。字世讚。高祖第三子。小字六通。

元帝諱繹。字世誠。高祖第七子。小字七符。

敬帝方智。字惠相。世祖第九子。小字法真。

昭明太子統。字德施。高祖長子。母曰丁貴嬪。小字維摩。蕭藻字靖藝。少立名行。志操清潔。善屬文。好古體。

詩。高祖每曰。子弟並如迦業。吾復何憂。累遷尙書左僕射。迦業統小字。

豫章王綜。初綜母吳淑媛。本齊東昏宮人。復爲高祖所幸。生綜。媛常私謂綜曰。我齊宮懷汝入梁。七月而

生。實永元遺體。綜深信之。密有異志。及爲南徐州刺史。有練樹並令斫伐之。以高祖名練故也。竟以彭

城降于索虜。

馬仙琿字靈馥。小名仙婢。長乃改名仙琿。善爲將。與士卒同勞苦。居無帷幕衾屏。與厮養最下者同。任昉字彥升。樂安人。文章之美。冠絕一時。官至太常。昉有四子。東里。西華。南容。北叟。並無學術。墜其家業。劉孝標見昉諸子流離。不能自振。平生舊交。莫有收卹者。西華。冬月著葛被練裙。路逢峻。峻惕然矜之。乃廣朱公叔絕交論。劉旣見其論。抵几於地。終身爲恨。

柳中禮。小字申子。故庾信哀江南賦云。申子奮發勇氣。咆勃實愬元戎。身先士卒。胄落魚門。兵填馬窟。累

祀通中。頓遭刮骨。功業有稱。身名埋沒。

柳於清塘一戰遭重創。至於城陷不時復戰。

謝覽弟舉。與王筠。王泰。俱有令名。時人爲之語曰。王有養矩。謝有覽舉。養矩。筠。泰。小字也。

劉孝綽。字孝綽。幼聰敏。能屬文。舅王融深賞異之。每言曰。天下文章。若無我。當歸阿士。阿士。綽小字也。父繪。友人任昉。沈約。范云等皆造之。官至秘書監。綽少有盛名。仗氣負才。多所凌忽。詞藻爲當時所宗。每作一篇。朝成暮遍。傳寫絕域。綽弟姪羣從七十人。皆善文。近古未之有也。有三妹。嫁王叔英。張乘。徐排。皆有才學。排妻尤爲清拔也。昭明太子好文士。常遊晏玄圃。執王筠袖。撫孝綽肩曰。可謂左挹浮丘袂。右拍洪崖肩。其見重如此。

羊侃字祖忻。少瑰偉。身長七尺八寸。愛文雅。博涉書記。關弓至十石。嘗於兗州堯廟牆。直上至五尋。橫行七迹。性豪侈。善音律。自造採蓮歌。甚有新致。姬妾列侍。窮極侈靡。有彈箏人名大善。着鹿角瓜。長七寸。舞人張靜璇。腰圍一尺六寸。時人咸推能掌上舞。又有孫景玉。能反腰帖地。衝得席上玉簪。大同中。魏

使楊裴同晏賓客三百餘人。皆食金寶器。奏三部女樂。至夕。侍女百餘人。皆執金花燭。俱不飲酒。而好賓遊。終日獻酬。同其醒醉。

陳高祖霸先。字興國。小字法生。吳興長城人。漢大丘長寔之後也。

廢帝伯宗。字奉業。小字藥王。世祖長子也。仁弱無人君體。太后廢爲臨海王。

宣帝項。字紹世。小字師利。始興王第二子。身長八尺二寸。手垂過膝。嘗張燈夜寢。見者乃是太龍。無不驚走。避於他室。世祖踐阼。封安成王。及廢帝。乃卽帝位。梁大同二年。梁元徵高祖入侍。累遷中書侍郎。永定二年。襲封始興王。十四年崩。遺制以瓦器葬寧顯陵。廟號高祖。

後主叔寶。字元秀。小字黃奴。宣帝長子。立而嗜酒賦詩。不恤國事。工文。爲長夜之飲。常在庭任用中書舍人沈客卿等。又起臨春結綺望仙三閣。華麗侈靡。自古未有。隋晉王入臺城。百萬之衆。不戰而亡。

司馬暹。字文叔。河內溫人也。幼有至性。十二丁內艱。水漿不入口。殆將一旬。梁帝見暹羸瘦。謂其父子產曰。昨見羅兒。傷其憔悴。使人惻然。便是不墮家風。有子矣。羅兒暹小字。

徐陵。字孝穆。擢之子。幼聰敏。善屬文。爲兒時。沙門寶誌見之。驚曰。天上麒麟。何因至此。因小字僧悅。陵母臧氏。嘗夢五色雲化爲鳳。集左肩上。已而誕陵。陵目有青睛。時人以爲聰慧之相。自有陳創業。文檄及禪授詔策。皆陵所作。爲一代文宗。子份。九歲作夢賦。陵見之。語所親曰。吾幼時屬文。亦不如此。

任忠。字奉誠。小字蠻奴。汝陰人。少孤微。不爲鄉里所重。及長。詭譎多計。後累以戰功進鎮南將軍。及隋兵

入忠出戰敗。入見後主啓云。陛下唯當具舟楫上流。羣臣以死衛。後主信之。時隋將韓擒虎自雞林入。忠乃降。隨軍入南掖門。至長安授開府卒。

周文育字景德。義興人。本姓頓。名猛奴。居新安壽昌里。年十一能游。以復數里。跳高五六尺。與羣兒聚戲。莫能及者。周會爲壽昌蒲口戍主。見而奇之。乞爲己子。請周舍爲製名字。命兄子弘讓教之。書計。文育曰。誰能學此。取富貴有大槩耳。讓壯之。乃教騎射。從高祖破侯景。累功爲鎮南將軍。

陳子高會稽人。世祖時爲吳興守。高年十六。爲惣角。容貌美麗。狀似婦人。世祖見而問之。能事我乎。高許諾。本名蠻子。世祖改命今名。執備身刀。世祖寵之。

後魏元父字伯携。小字長叉。父妻林太后之妹。太后臨朝。以父妹夫除通直郎常侍。妻封馮翊君。拜女侍郎。父以此意勢日盛。遷侍中。加領軍。既在門下。兼惣禁軍。深爲太后所信。太傅清河王澤親賢輔政。後太后寵稍薄。因解侍中除民。初咸陽王禧以逆見誅。子樹奔梁。梁封爲鄴王。又擅權。樹乃遣魏公卿書曰。元叉本名夜叉。元羅本名羅刹。夜叉羅刹。此鬼食人。非遇黑風事。同飄墮。嗚呼。魏景羅此二灾。昆季此名。必能噬物。未幾有人告。叉謀叛。得其手書。並賜死。

游雅字伯度。小字黃頭。廣平任人也。太武時與渤海高允俱知名。徵拜中書博士。雅性剛贍。好自矜誕。凌躡人物。高允重雅。雅輕允才。不以爲恨。允將昏邢氏。雅勸允昏其族。允不從。雅曰。人貴河間邢。不勝廣平游。人自棄伯度。我自敬黃頭。貴己賤人。皆此類也。

方舟先生胸中有老氏藏書。取張華博物志、倣而續之。蓋遊戲引筆。以占其胸中藏書何如耳。司馬子長。敍孔子所以聖者。而記其辯商羊、專車之骨等事。或者謂此特子產之儔。不宜以此累夫子。遷則陋矣。而或者亦未之察也。夫道固絕學。然豈必邊不省識一物。而頽然以獨造耶。詩識鳥獸草木之名。易知鬼神之情狀。于道與有力焉。子在川上。所見者水。而所取者道也。具此見以觀此書。則幾矣。門人廸功郎眉山簿黃公泰謹跋。